

LEI 9/1988, DO 19 DE XULLO, DE ESTATÍSTICA DE GALICIA.

*MODIFICADA POLA LEI 7/1993, DO 24 DE MAIO; POLA LEI 10/2001,
DO 17 DE SETEMBRO, POLA LEI 16/2006, DO 27 DE DECEMBRO E
POLA LEI 8/2011, DO 9 DE NOVEMBRO.*

Chegar ao coñecemento o máis obxectivo e completo posible da realidade socio-económica dos países é unha esixencia crecente por parte da sociedade así como das institucións que a serven. Na evolución que se está a dar trátase non só de que os gobernos e as súas dependencias dispoñan de información suficiente desa realidade para a máis axeitada toma de decisións, senón tamén de que esa abondosa información sexa un ben común, accesible a todos.

As técnicas estatísticas, polo seu carácter cuantificador e ao mesmo tempo poderosamente sintetizador, son un dos mellores procedementos existentes para ver de chegar ao coñecemento obxectivo e completo da realidade socio-económica o que explica o seu crecente uso por parte de todos os gobernos tanto para ter en conta datos desa orixe na súa toma de decisións, e para o seguimento e avaliación dos resultados que de tales decisións se deriven, como para poñer eses datos á disposición da sociedade.

O Estatuto de Autonomía de Galicia expresa a importancia que lle concede a esta problemática ao declarar no seu artigo 27, punto seis, que é competencia exclusiva desta “a estatística para os fins da Comunidade Autónoma de Galicia”.

Consecuencia da citada disposición estatutaria é a necesidade de desenvolver adecuadamente a organización que faga efectiva a competencia tratada. A existencia desa necesidade faise máis patente ao ter en conta que non só é a información estatística e o estudo da realidade o seu obxectivo, senón tamén que cada vez máis a distribución de fondos e a asignación de recursos procedentes das administracións públicas, especialmente os derivados da integración española na Comunidade Económica Europea, se fai depender legalmente de variables estatísticas como, por exemplo, o paro, o valor de produción engadido, os indicadores de servizos sociais atinxidos e outras nas que se reflicta o nivel de riqueza e benestar.

Como introdución ao desenvolvemento organizativo corresponde á competencia estatística, da nosa comunidade autónoma, o Decreto 148/1984, do 6 de setembro, creou o Centro de Información Estatística de Galicia. Nese decreto indicábase tamén a necesidade dunha lei de

estatística axeitada ás esixencias actuais, así como a elaboración, dun plan estatístico no que se estruturan os diversos traballos estatísticos que se van realizar.

A presente lei é o marco xurídico para coordinar as distintas institucións públicas existentes en Galicia co fin de integrar e harmonizar a elaboración de estatísticas que se reflectirán no Plan estatístico e nos programas anuais.

Estrutúrase en dous títulos. No Título I, que á súa vez se divide en catro capítulos, regúlanse os principios e as disposicións xerais da actividade estatística na Comunidade Autónoma galega, e é así que se regula o papel do consello para o plan e programas estatísticos, os principios de obxectividade e a corrección técnica, así como a obriga de colaboración e de segredo estatístico co seu posible réxime sancionador, indicando ademais a normativa de aprobación e a obriga de dar publicidade dos resultados estatísticos.

O Título II recolle a organización estatística da comunidade, constituída polo Instituto Galego de Estatística, os órganos estatísticos das consellerías e o Consello Galego de Estatística; as funcións destes así como os principios de organización, artellamento e medios indícanse nos distintos capítulos do título.

No texto e no espírito da lei está sempre presente a busca da mellora na información estatística, da obxectividade, do rigor técnico e da necesaria homologación, de acordo con normas xerais, que permitan a análise, a comparación e a integración de resultados cos de calquera outro espazo xeográfico.

Por todo o exposto, o Parlamento de Galicia aprobou e eu, de conformidade co artigo 13º. 2. do Estatuto de Galicia e co artigo 24 da Lei 1/1983, do 23 de febreiro, reguladora da Xunta e do seu presidente, promulgo, en nome do rei, a Lei de estatística de Galicia.

TÍTULO I. A ESTATÍSTICA DA COMUNIDADE AUTÓNOMA DE GALICIA

CAPÍTULO I. DISPOSICIÓNS XERAIS

ARTIGO 1

A presente lei ten como obxecto regular a actividade estatística para os fins da Comunidade Autónoma de Galicia.

ARTIGO 2

(modificado parcialmente pola Lei 8/2011, do 9 de novembro)

Para os efectos desta lei, enténdese por actividade estatística galega a recompilación, elaboración e ordenación sistemática da información cuantificable, a publicación e difusión de resultados necesarios ou útiles para o coñecemento cuantitativo, a análise da realidade demográfica, agraria, pesqueira, industrial, comercial, financeira, de servizos, social, cultural e ambiental de Galicia e, en xeral, calquera cuestión referida ás condicións de vida, fins e competencias da comunidade autónoma.

ARTIGO 3

A presente lei regula e protexe a actividade estatística levada a cabo con carácter oficial pola Xunta de Galicia e polos entes públicos galegos de carácter territorial, así como polos organismos e polas empresas dependentes destes.

ARTIGO 4

Esta lei non regula as enquisas de opinión.

ARTIGO 5

A actuación referente á estatística da Comunidade Autónoma de Galicia adecuarase, especificamente, aos principios de interese público, obxectividade, corrección técnica, obrigatoriedade da colaboración cidadá, respecto á intimidade, segredo estatístico e publicidade dos resultados na forma que se determina no Capítulo III.

CAPÍTULO II. A ACTIVIDADE ESTATÍSTICA

SECCIÓN PRIMEIRA

DO PLAN E DOS PROGRAMAS ESTATÍSTICOS ANUAIS

ARTIGO 6

1. O Plan galego de estatística é o instrumento da ordenación e planificación da actividade estatística da Comunidade Autónoma de Galicia.
2. O Plan galego de estatística será obxecto de aprobación polo Parlamento mediante lei, e terá a vixencia establecida neste, ou, no seu defecto, a de catro anos.

ARTIGO 7

A elaboración do anteproxecto do Plan galego de estatística correspóndelle ao Instituto Galego de Estatística, e será elevado ao Consello da Xunta para a súa aprobación, logo de informe do Consello Galego de Estatística.

ARTIGO 8

1. Malia o disposto nos artigos anteriores, a Xunta de Galicia con carácter excepcional poderá dispoñer por decreto a elaboración de estatísticas non incluídas no Plan galego de estatística se apreciase a súa conveniencia e despois de transcorrido un ano desde a aprobación do plan. Do dito acordo deberáselle dar conta ao Parlamento.
2. As estatísticas a que se refire o punto anterior tamén gozarán dos beneficios recoñecidos na presente lei.

ARTIGO 9

1. Para o desenvolvemento e a execución do Plan galego de estatística, o Consello da Xunta, por proposta do conselleiro de Economía e Facenda, aprobará un programa estatístico, que terá a vixencia dun ano natural.
2. A elaboración do proxecto do programa estatístico corresponderalle ao Instituto Galego de Estatística, logo de informe do Consello Galego de Estatística.

ARTIGO 10

As normas reguladoras de cada estatística aprobaranse por decreto, o cal determinará como mínimo:

- a) Os obxectivos.
- b) Ámbito territorial.
- c) A periodicidade.
- d) As consellerías ou os organismos da Xunta que levarán a cabo a actividade estatística.
- e) Presuposto estimado para cada estatística.
- f) As persoas ou entidades obrigadas á subministración de información, así como a forma e os prazos nos que se debe subministrar esta.
- g) A forma e os prazos, se é o caso, nos que se deberá difundir a estatística.

ARTIGO 11

1. As estatísticas de específico interese para as entidades territoriais e para os outros entes públicos poderanse incluír no Plan galego de estatística.
2. Son requisitos para a súa incorporación:
 - a) Solicitude dirixida á Consellería de Economía e Facenda.
 - b) Memoria explicativa na que se detallen as características e o interese público da estatística.
 - c) Memoria económica e custo que asume a entidade interesada.
 - d) Informe do Instituto Galego de Estatística e das consellerías afectadas.
3. Así mesmo, as corporacións e asociacións que representen intereses sectoriais poderán solicitar, cos mesmos requisitos do punto anterior, a inclusión de estatísticas de interese público no Plan galego de estatística.

ARTIGO 12

1. As estatísticas elaboradas polas entidades territoriais e demais entes públicos, non incluídas no plan nin nos seus programas estatísticos, poderanse homologar polo Instituto Galego de Estatística se se adaptan ás normas técnicas establecidas pola Xunta nesta materia.
2. No caso de estudos subvencionados pola Administración pública, a actividade estatística será sometida ás normas técnicas establecidas polo Goberno de Galicia por proposta dos órganos competentes na materia.
3. Na difusión do resultado destas estatísticas non incluídas no Plan galego de estatística farase constar se están ou non homologadas polo Instituto Galego de Estatística.

ARTIGO 13

1. As actividades estatísticas que desenvolva o Instituto Galego de Estatística en execución de convenios de cooperación ou colaboración cos organismos oficiais competentes na materia seranlles comunicadas previamente polo director do instituto ao Conselleiro de Economía e Facenda e ao Consello Galego de Estatística.
2. Das actividades estatísticas realizadas en virtude destes convenios daráselle conta ao Parlamento de Galicia.

SECCIÓN SEGUNDA

APROBACIÓN DOS RESULTADOS ESTADÍSTICOS

ARTIGO 14

1. A aprobación dos resultados estatísticos farase de acordo co disposto no Plan galego de estatística e, no caso de que este non o determine, coas normas reguladoras en materia estatística.
2. A aprobación provisoria dos resultados corresponderalle ao Instituto Galego de Estatística. Ao tempo de se faceren públicos poñeranse en coñecemento do Consello Galego de Estatística e da Xunta de Galicia, e se non recibisen obxeccións expresas no prazo de tres meses quedarán oficialmente aprobados.
3. Os resultados das estatísticas oficiais serán, despois da súa publicación no Diario Oficial de Galicia, de aplicación obrigatoria ás relacións e situacións xurídicas nas que a Comunidade Autónoma de Galicia teña competencia para impoñelos.

CAPÍTULO III. PRINCIPIOS E GARANTÍAS DA ACTIVIDADE ESTADÍSTICA

SECCIÓN PRIMEIRA

DO PRINCIPIO DE INTERESE PÚBLICO

ARTIGO 15

A presente lei protexe as estatísticas elaboradas por motivos de interese público, tendo tal consideración as incluídas no Plan estatístico e aquelas ás que alude o artigo 8.

SECCIÓN SEGUNDA

DOS PRINCIPIOS DE OBXECTIVIDADE E DE CORRECCIÓN TÉCNICA

ARTIGO 16

As estatísticas elaboraranse con criterios obxectivos e de conformidade cos principios científicos que aseguren a súa corrección técnica.

ARTIGO 17

1. Corresponderalle ao Instituto Galego de Estatística preparar as normas polas que se rexerán e as características técnicas que terán as estatísticas, e respectar ao máximo os principios de universalidade así como os de peculiaridade galega.
2. As ditas normas técnicas aprobaranse por decreto da Xunta.

SECCIÓN TERCEIRA

DA OBRIGA DE COLABORACIÓN

ARTIGO 18

As estatísticas incluídas no Plan galego de estatística, nos programas estatísticos anuais e as previstas nos convenios de colaboracións aos que se refire o artigo 13 desta lei terán, para a súa elaboración, a obrigatoriedade, de colaboración cidadá.

ARTIGO 19

1. Cando se soliciten datos de carácter persoal débese proporcionar ao interesado información suficiente sobre a natureza, características e finalidade da enquisa, e advertilo, ademais, da voluntariedade ou non da colaboración e do segredo que se gardará respecto dela.
2. Se a subministración de información fose obrigatoria, advertiranse os suxeitos afectados das sancións que se lles poderán impoñer por non colaborar ou por facilitar datos inexactos, incompletos ou fóra de prazo.

ARTIGO 20

Os cuestionarios non poderán conter preguntas que teñan unha relación directa co dereito ao honor, á intimidade persoal e familiar e ás conviccións relixiosas ou políticas do informante. Os cuestionarios respectarán en todo caso o disposto no artigo 18 da Constitución española.

ARTIGO 21

1. A obriga de subministrar información veraz, cando sexa formalmente esixida, comprenderá a todas as persoas con independencia da súa natureza, física ou xurídica, privada ou pública, e da nacionalidade daquelas, sempre que teñan o seu domicilio, a súa residencia ou estean establecidas dentro do ámbito territorial da Comunidade Autónoma de Galicia. A información poderá ter por obxecto actividades levadas a cabo fóra do dito territorio se fose apropiado ás finalidades perseguidas pola estatística e estivese previsto polas normas reguladoras desta.
2. A mesma obriga incúmbelles a todas as administracións públicas situadas en Galicia, no que se refire ás actividades levadas a cabo dentro deste territorio.

ARTIGO 22

1. A información deberá ser subministrada no tempo, na forma e coas características aprobadas nas normas reguladoras de cada estatística e polas persoas que estas determinen.
2. As normas reguladoras poden establecer que a información sexa subministrada en forma agregada e por escrito.

ARTIGO 23

A norma reguladora de cada estatística sinalará, se é o caso, o dereito á compensación económica polos gastos que haxa de asumir o informante para subministrar a información, se estes gastos son provocados pola esixencia de soporte informático ou doutro sistema de información que teña unha complexidade técnica especial ou que obrigue a unha recompilación previa de datos que na forma demandada non se encontren á disposición da administración ordinaria do informante.

SECCIÓN CUARTA

DO SEGREDO ESTADÍSTICO

ARTIGO 24

(Modificado parcialmente pola Lei 7/1993, do 24 de maio; Modificado parcialmente pola Lei 16/2006, do 27 de decembro)

1. Serán obxecto de protección e quedarán amparados polo segredo estatístico tanto os datos relativos ás persoas físicas coma ás persoas xurídicas.
2. O segredo estatístico amparará a totalidade de datos individualizados de orde privada, persoal, familiar, económica ou financeira utilizados para elaborar a estatística.
3. Os datos individuais facilitados por razóns estatísticas non se poderán usar en ningún caso para finalidades fiscais ou policiais, nin para calquera outra distinta daquela para a que foron solicitados.

4. O segredo estatístico é vulnerado non só pola comunicación directa de datos non autorizada, senón tamén pola comunicación de datos dos que se poida deducir razoablemente información individual.

Sen prexuízo do establecido nas alíneas anteriores:

- a) Non quedarán amparados polo segredo estatístico os directorios que non conteñan máis datos ca simples relacións de establecementos, empresas, explotacións ou organismos de calquera clase, en canto aludan á súa denominación, localización, actividade e ao intervalo de tamaño ao que pertencen.
- b) Non quedarán amparados polo segredo estatístico os datos que sexan de coñecemento público notorio.
- c) Non quedarán amparados polo segredo estatístico os datos dos rexistros administrativos propios que non fosen achegados polos interesados como información estatística. Os ditos datos, non obstante, gozan de confidencialidade e dos criterios de difusión que lles corresponda segundo a normativa específica que lle sexa de aplicación.
- d) Os interesados terán dereito de acceso aos datos persoais que figuren nos directorios estatísticos e a obter a rectificación dos erros que conteñan.
- e) As normas de desenvolvemento da presente lei establecerán os requisitos necesarios para o exercicio do dereito de acceso e rectificación a que se refire o punto anterior deste artigo, así como as condicións que se haberán de ter en conta na difusión dos directorios non amparados polo segredo estatístico.

ARTIGO 25

1. Os datos que sirvan para a identificación dos obrigados a subministrar información débense destruír cando a súa conservación xa non sexa necesaria para o desenvolvemento das operacións estatísticas.
2. En todo caso, os apelidos e o enderezo dos obrigados a subministrar información separaranse dos demais datos.

ARTIGO 26

1. Todas as persoas, organismos e institucións que interveñan nas operacións reguladas pola presente lei terán a obriga de manter o segredo estatístico respecto dos datos comunicados. Esta obriga conservarana as persoas aínda despois de concluír as súas actividades profesionais e a súa vinculación cos servizos estatísticos.
2. En virtude da dita obriga, os datos individuais comunicados non se poderán facer públicos nin se lle comunicarán a ningunha persoa ou entidade.

ARTIGO 27

1. O deber de segredo estatístico iniciárase desde o momento no que se facilite a información por el amparada e terá unha duración de cen anos.

2. Excepcionalmente, e sempre despois de transcorreren sesenta anos, poderánselle facilitar os datos amparados polo segredo estatístico a quen acredite ter interese lexítimo, unicamente para os efectos de análise histórica, e pretenda a publicación do resultado das ditas análises.

ARTIGO 28

O incumprimento do deber do segredo estatístico dará lugar a responsabilidades indemnizatorias dos danos e prexuízos causados, nos termos establecidos no ordenamento xurídico, con independencia das responsabilidades penais e disciplinarias sobre os funcionarios e demais persoal público, e da potestade sancionadora á que se refire o capítulo IV deste título.

SECCIÓN QUINTA

DA PUBLICIDADE DOS RESULTADOS ESTADÍSTICOS

ARTIGO 29

(Modificado parcialmente pola Lei 16/2006, do 27 de decembro)

1. A publicación ou difusión dos datos estatísticos farase sen referencias de carácter individual, de acordo coas normas reguladoras do segredo estatístico.
2. As estatísticas comprendidas no Plan galego de estatística serán obxecto de difusión pública.

ARTIGO 30

(Modificado parcialmente pola Lei 16/2006, do 27 de decembro)

1. Calquera persoa pode demandar unha certificación sobre os resultados estatísticos globalizados publicados, que lle será enviada por escrito, en soporte informático ou por calquera outro medio, segundo as características da solicitude.
2. As universidades e os centros de investigación recoñecidos poden establecer acordos co Instituto Galego de Estatística ou, se é o caso, coas consellerías e coa Administración pública territorial para a explotación das bases de datos destinados a elaborar as estatísticas reguladas por esta lei; estes acordos terán por finalidade exclusiva favorecer a investigación científica. Co fin de preservar o segredo estatístico, o Instituto Galego de Estatística supervisará o proceso de consulta dos datos citados e elevaralles o informe correspondente ao conselleiro de Economía e Facenda e á autoridade superior do departamento ou Administración asinantes do acordo.
3. A través do Instituto Galego de Estatística calquera persoa pode demandar información estatística das estatísticas reguladas por esta lei a un nivel de agregación diferente daquel no que estivesen publicadas, salvando sempre a garantía do segredo estatístico.

4. O Instituto Galego de Estatística é o único organismo habilitado para emitir certificacións oficiais respecto das estatísticas elaboradas pola Xunta e respecto das estatísticas das entidades territoriais incluídas no Plan galego de estatística.

ARTIGO 31

1. A publicación ou a difusión da estatística é gratuíta cando así o determine a norma reguladora respectiva.
2. No ámbito da Xunta, os prezos esixidos serán determinados debidamente mediante tarifas acordadas e publicadas para este fin polo Instituto Galego de Estatística e non son consideradas como taxas administrativas.
3. No ámbito das entidades territoriais, a esixibilidade, a natureza e a aprobación das contraprestacións ateranse á lexislación específica que lles sexa aplicable.

CAPÍTULO IV

REXIME SANCIONADOR

ARTIGO 32

Son infraccións administrativas na materia estatística as accións e omisións contrarias ás disposicións legais contidas nesta lei.

ARTIGO 33

As infraccións ao preceptuado nesta lei poderanse considerar leves, graves ou moi graves.

- a) Consideraranse infraccións leves:
 1. Non proporcionar, ou facelo de xeito incompleto, a información e advertencia ás que alude o artigo 16.
 2. Subministrar información obrigatoria para efectos estatísticos fóra de prazo, se existise requirimento previo do órgano estatístico legalmente notificado.
- b) Consideraranse infraccións graves:
 1. A reincidencia na comisión de infraccións leves.
 2. Non facilitar datos ou proporcionarlos incompletos cando a enquisa sexa obrigatoria, sempre que existise o requirimento a que se alude na letra a).
 3. Incumprir as normas técnicas aprobadas na materia estatística.
 4. Incumprir a obriga de entregarlle ao Parlamento ou á Consellería de Economía e Facenda os resultados das estatísticas.
- c) Consideraranse infraccións moi graves:
 1. A reincidencia na comisión de infraccións graves.
 2. A subministración de datos falsos, ben sexan de comunicación voluntaria, ben de comunicación obrigatoria.

3. Difundir ou comunicarlles a persoas non autorizadas datos individualizados amparados polo segredo estatístico.
4. Comunicarlles datos a persoas non obrigadas a manter o segredo estatístico de xeito que diso se poida deducir información confidencial sobre datos persoais.
5. Esixir información para a elaboración de estatísticas sen ter a condición de persoal estatístico.

ARTIGO 34

(Modificado parcialmente pola Lei 10/2001, do 17 de setembro).

1. As infraccións das normas desta lei serán obxecto de sancións administrativas, logo de instrución do correspondente expediente sancionador, e sen prexuízo das responsabilidades civís e penais que procedan.
2. Corresponderalle ao Instituto Galego de Estatística a iniciación e instrución dos expedientes sancionadores por infraccións administrativas en materia estatística. A competencia para ditar a resolución que poña fin ao procedemento corresponderalles ao conselleiro de Economía e Facenda nos casos de infraccións leves e graves e ao Consello da Xunta de Galicia nas infraccións moi graves.

ARTIGO 35

(Modificado na súa totalidade pola Lei 7/1993, do 24 de maio; Modificado parcialmente pola Lei 16/2006, do 27 de decembro).

1. Serán aplicables as seguintes sancións:
 - a) As infraccións leves sancionaranse con multa de 100 a 500 euros.
 - b) As infraccións graves sancionaranse con multa de 501 a 2.500 euros.
 - c) As infraccións moi graves sancionaranse con multa de 2.501 a 10.000 euros.
2. Aquelas infraccións nas que o infractor obtivese un beneficio económico superior ao tope máximo indicado no punto anterior sancionaranse con multa, que pode chegar ata o dobre do beneficio obtido.
3. En todo caso, para a gradación das sancións aplicables terase en conta a transcendencia da información, a conduta do culpable e os danos e perdas causados a terceiros e aos servizos estatísticos.
4. Para os efectos do disposto no artigo 33.º, entenderase por reincidencia a comisión dunha infracción análoga á que motivou a sanción no prazo do ano seguinte á notificación desta. Neste suposto requirirase que a primeira resolución sancionadora xa adquirise firmeza na vía administrativa.

ARTIGO 36

As sancións administrativas neste capítulo non serán obstáculo para a esixencia de responsabilidades aos infractores ante a xurisdición ordinaria ou contencioso-administrativa.

TÍTULO II. A ORGANIZACIÓN ESTATÍSTICA DA COMUNIDADE AUTÓNOMA DE GALICIA

CAPÍTULO I. DISPOSICIÓNS XERAIS

ARTIGO 37

(Modificado parcialmente pola Lei 7/1993, do 24 de maio)

A organización estatística da Comunidade Autónoma de Galicia estará constituída por:

- a) O Instituto Galego de Estatística.
- b) Os órganos estatísticos sectoriais.
- c) O Consello Galego de Estatística.

CAPÍTULO II. O INSTITUTO GALEGO DE ESTATÍSTICA

SECCIÓN PRIMEIRA

CREACIÓN E FUNCIÓNS

ARTIGO 38

(Modificado na súa totalidade pola Lei 7/1993, do 24 de maio)

1. Créase o Instituto Galego de Estatística, que se configura como organismo autónomo de carácter administrativo con personalidade xurídica e patrimonio propios.
2. O Instituto Galego de Estatística quedará adscrito á Consellería de Economía e Facenda.

ARTIGO 39

Son funcións do Instituto Galego de Estatística:

1. A dirección e coordinación da actividade estatística no ámbito competencial da Comunidade Autónoma de Galicia.
2. A coordinación da actividade estatística levada a cabo polas distintas administracións públicas de Galicia.
3. Levar a cabo as estatísticas ou as fases destas que lle encomenden o Plan galego de estatística e os seus correspondentes programas estatísticos, así como calquera outras que lle poidan encomendar ou que se estableza en virtude de convenios con outros organismos estatísticos.
4. Colaborar en estatísticas de interese estatal ou supraestatal promovidas polos organismos competentes.
5. Promover a aplicación de normas e requisitos técnicos unitarios para as estatísticas galegas e a aprobación de códigos e nomenclaturas de interese propio, intentar que se

adapten e integren no contexto das estatísticas estatais e supraestatais, e darlles a maior difusión posible.

6. Elaborar, actualizar e estar presente no deseño e na confección dos ficheiros-directorios que utilizarán os órganos e entes da Administración autónoma de Galicia. Así mesmo, deberá ser escoitado no deseño e na reforma dos procedementos administrativos da comunidade autónoma que, pola súa natureza, poidan ter consecuencias na produción de informacións de posible utilización estatística.
7. Coordinar as peticións e mais as solicitudes en materia estatística das distintas consellerías respecto de calquera outra institución ou organismo da Administración central ou local.
8. Prestar servizos de recompilación, almacenaxe e difusión da documentación estatística dispoñible.
9. Desenvolver bases de datos sobre a información estatística de interese público para Galicia.
10. Analizar as necesidades e a evolución da demanda de estatísticas en Galicia.
11. Relacionarse con organismos estatais e internacionais con competencia sobre materias estatísticas e propoñerlle ao Consello da Xunta integrarse neles.
12. Asegurar a difusión axeitada das estatísticas publicadas de Galicia, a través dos medios máis pertinentes, e estender certificacións dos resultados estatísticos da súa competencia.
13. Velar polo cumprimento das normas técnicas aprobadas e pola aplicación das garantías necesarias para que sexan respectados o segredo estatístico e as outras condicións xurídicas ás que se debe suxeitar a actividade estatística.
14. As demais competencias que se lle atribúan na presente lei.

SECCIÓN SEGUNDA

ORGANIZACIÓN DO INSTITUTO GALEGO DE ESTADÍSTICA

ARTIGO 40

A estrutura do Instituto Galego de Estatística determinarase mediante decreto. Á fronte deste existirá un director, que será nomeado polo Consello da Xunta por proposta do conselleiro de Economía e Facenda.

ARTIGO 41

1. Correspóndenlle ao director do Instituto Galego de Estatística as seguintes competencias:

1ª A representación legal do Instituto.

2ª A xefatura do persoal do Instituto e de todos os servizos deste.

3ª O impulso, a dirección e mais a coordinación da actividade do Instituto.

4ª Todas as demais que lles correspondan ao instituto e que non fosen atribuídas expresamente a outros órganos deste.

2. No desenvolvemento das súas funcións, o director actuará con total independencia en todos os aspectos técnicos e científicos relacionados coa actividade estatística de Galicia.

SECCIÓN TERCEIRA

FACENDA E PRESUPOSTO DO INSTITUTO GALEGO DE ESTATÍSTICA

ARTIGO 42

A facenda do Instituto Galego de Estatística estará formada por:

1. As asignacións procedentes dos presupostos xerais da Comunidade Autónoma de Galicia.
2. As asignacións procedentes dos presupostos doutras entidades públicas.
3. As achegas de calquera outra entidade ou persoa pública ou privada.
4. As cantidades que deba percibir Galicia como consecuencia de convenios de cooperación coa Administración do Estado e con outros entes públicos por razón das actividades desenvolvidas polo instituto.
5. Os ingresos obtidos polas súas actividades de xestión e explotación, así como os dos servizos que poida realizar.
6. Calquera outra asignación autorizada polas leis.

ARTIGO 43

O presuposto para o desenvolvemento da actividade do Instituto Galego de Estatística elaborárase anualmente e con suxeición ao preceptuado na materia para os organismos autónomos administrativos pola Lei 3/1984, do 3 de abril, de xestión económica e financeira Pública de Galicia, e polas demais normas que a complementen ou desenvolvan.

CAPÍTULO III

OUTROS ÓRGANOS ESTATÍSTICOS

(Denominación modificada pola Lei 7/1993, do 24 de maio)

ARTIGO 44

(Modificado na súa totalidade pola Lei 7/1993, do 24 de maio; Modificado parcialmente pola Lei 16/2006, do 27 de decembro)

Órganos estatísticos sectoriais.

1. Co obxecto de promover o desenvolvemento da actividade estatística na Comunidade Autónoma de Galicia, así como o aproveitamento das potencialidades estatísticas existentes, designaranse órganos estatísticos nos departamentos da Xunta de Galicia e, se é o caso, nos organismos e entes públicos dependentes dela, que deberán coordinar a súa actividade co Instituto Galego de Estatística.

2. A designación e regulación deses órganos determinarase regulamentariamente.
3. Os órganos estatísticos sectoriais terán, no desenvolvemento das súas actividades, as seguintes funcións:
 - a) Elaboración e difusión das estatísticas propias da consellería e dos organismos e entes públicos correspondentes.
 - b) Elaboración das estatísticas ou fases delas que lles encomenden o Plan galego de estatística e os seus programas estatísticos.
 - c) Colaboración co Instituto Galego de Estatística na elaboración do anteproxecto do Plan galego de estatística e dos proxectos dos seus programas anuais.
 - d) Colaboración co Instituto Galego de Estatística no deseño e na confección dos ficheiros-directorios que utilizarán os órganos e entes da Administración autonómica de Galicia.
 - e) Análise das necesidades estatísticas da consellería e dos organismos e entes públicos correspondentes.
4. Carácter do persoal estatístico.

O persoal que preste o seus servizos en calquera dos órganos ou entes do sistema estatístico de Galicia e que realice actividade estatística obterá o carácter de persoal estatístico, con independencia de seu nivel e da relación xurídica da que deriven aqueles, sempre que se cumpran os requisitos que regulamentariamente se establezan.

CAPÍTULO IV. O CONSELLO GALEGO DE ESTATÍSTICA

SECCIÓN PRIMEIRA

CREACIÓN E FUNCIÓNS

ARTIGO 45

Créase o Consello Galego de Estatística como máximo órgano consultivo da actividade estatística da Comunidade Autónoma de Galicia, para asegurar a participación dos axentes sociais e a relación entre a Administración e os usuarios da información estatística, promover o seu entendemento e facilitar a coordinación e o uso de metodoloxías comúns.

ARTIGO 46

O Consello Galego de Estatística será consultado sobre:

1. O anteproxecto do Plan galego de estatística. Para tal fin emitirá informe preceptivo no prazo de dous meses desde a data da súa remisión polo Instituto Galego de Estatística.
2. Os proxectos dos programas estatísticos anuais.
3. A adecuación e utilización dos conceptos, definicións, clasificacións, códigos e nomenclaturas utilizadas pola organización estatística da Comunidade Autónoma de Galicia na súa actividade estatística.

4. O contido do banco de datos estatísticos considerado no artigo 39 e o acceso á dita información por calquera tipo de usuario.
5. Os eventuais conflitos de competencia entre órganos estatísticos da comunidade ou con outros alleos a ela.
6. Os proxectos concretos en materia estatística que lle someterán á súa consideración.
7. A aplicación concreta da lexislación vixente en cada momento sobre o segredo estatístico, nos casos en que se presenten diferentes interpretacións.
8. Calquera outra cuestión que lle presente o Consello da Xunta ou o Instituto Galego de Estatística.

SECCIÓN SEGUNDA

COMPOSICIÓN DO CONSELLO

ARTIGO 47

(Modificado na súa totalidade pola Lei 7/1993, do 24 de maio; Modificado parcialmente pola Lei 16/2006, do 27 de decembro; Modificado parcialmente pola Lei 8/2011, do 9 de novembro)

1. O Consello Galego de Estatística estará composto polos seguintes membros:
 - a) O presidente, que será o conselleiro de Economía e Facenda.
 - b) O vicepresidente, que será o director do Instituto Galego de Estatística.
 - c) Un representante por cada un dos departamentos da Xunta de Galicia (Presidencia, Vicepresidencia, consellerías).
 - d) Dous representantes do Consello das Cámaras de Comercio Galegas.
 - e) Dous representantes das asociacións de empresarios.
 - f) Un representante de cada unha das organizacións sindicais máis representativas.
 - g) Tres representantes das organizacións profesionais de agricultores.
 - h) Dous representantes das organizacións de mariñeiros.
 - i) Dous representantes das organizacións de consumidores e usuarios.
 - j) Dous representantes da Administración local.
 - k) Un representante por cada unha das universidades de Galicia.
 - l) Tres persoas de relevancia profesional no campo da estatística.
 - m) Os subdirectores e mais o secretario técnico do IGE, de acordo coa súa estrutura orgánica, con voz e sen voto.
 - n) Un funcionario do Instituto Galego de Estatística, que desempeñará o cargo de secretario do consello, con voz e sen voto.
 - ñ) Un/Unha representante designado/a por cada un dos grupos parlamentarios con representación no Parlamento de Galicia
 - o) O/A presidente/a da Sociedade Galego para a Promoción da Estatística e da Investigación de operacións

SECCIÓN TERCEIRA

FUNCIONAMENTO E MEDIOS

ARTIGO 48

(modificado parcialmente pola Lei 8/2011, do 9 de novembro)

1. Consello Galego de Estatística actuará en pleno e en comisións, de acordo co Regulamento de funcionamento interno que aprobe este.
2. As xuntanzas do pleno serán ordinarias e extraordinarias, e terán lugar, en todo caso, por convocatoria da presidencia. Das ordinarias realizarase cando menos unha ao ano, ou dúas se nese ano non se reúne a Comisión Permanente. As extraordinarias celebraranse por instancia da metade dos membros do consello ou da maioría dos da súa comisión permanente, ou por iniciativa da presidencia.

Os acordos do pleno tomaranse por maioría simple, sendo dirimente o voto da presidencia en caso de empate.

3. No Consello Galego de Estatística funcionarán unha Comisión de Coordinación da Organización Estatística da Comunidade Autónoma de Galicia e unha Comisión Permanente.

A Comisión de Coordinación, presidida polo director do Instituto Galego de Estatística, estará constituída polos membros do consello representantes dos organismos estatísticos da Comunidade Autónoma de Galicia

A Comisión Permanente terá por finalidade o seguimento da realización dos programas de execución do plan e cuestións semellantes. Estará formada por once membros do consello, elixidos de entre os membros deste, os cales nomearán o seu presidente.

4. O consello poderá crear, para o mellor desenvolvemento das súas competencias, no seu seo, grupos de traballo dos que formarán parte os membros deste que se determinen en cada caso e tamén, se se considera de interese, outras persoas alleas ao consello. A secretaría destes grupos de traballo, que deixarán de existir cando remate a misión para a que os crearon, será cuberta por un funcionario do Instituto Galego de Estatística nomeado para tal efecto polo seu director xeral.
5. O consello, ademais dos informes técnicos que faga no desenvolvemento das súas competencias, elaborará anualmente unha memoria sobre a actividade da organización estatística de Galicia, que se fará pública.
6. Os medios que precise o consello para o seu correcto funcionamento serán cubertos polo instituto, con cargo ao seu presuposto.

Disposición adicional única

Facúltase o Consello da Xunta para revisar anualmente a contía das sancións previstas na presente lei, co fin de adecualas ás modificacións experimentadas polo índice xeral de prezos ao consumo.

Disposición transitoria primeira

Nun prazo non superior a oito meses, a partir da entrada en vigor da presente lei, o Consello da Xunta presentaralle ao Parlamento un proxecto do Plan galego de estatística.

Disposición transitoria segunda

Nun prazo máximo de tres meses, a partir da entrada en vigor da presente lei, constituirase o Consello Galego de Estatística, e, nun prazo non superior a cinco meses da entrada en vigor da presente lei, o Consello Galego de Estatística aprobará o seu regulamento de funcionamento interno.

Disposición transitoria terceira

Á entrada en vigor da presente lei transferiráselle ao Instituto Galego de Estatística, que agora se crea, os medios materiais e persoais e as correspondentes dotacións presupostarias actualmente afectas ao Centro de Información Estatística de Galicia, creado polo Decreto 148/1984, do 6 de setembro, así como as dotacións complementarias que se consideren convenientes para o seu correcto funcionamento neste primeiro exercicio.

Disposición transitoria cuarta

Os convenios ou acordos asinados previamente polo Centro de Información Estatística seguirán a rexerse pola súa propia normativa.

Disposición derogatoria

Quedan derogadas cantas disposicións se opoñan ao disposto na presente lei.

Disposición derradeira

O Consello da Xunta e a Consellería de Economía e Facenda, no ámbito das súas respectivas competencias, adoptarán cantas disposicións sexan necesarias para a aplicación e o desenvolvemento da presente lei.

Disposición derradeira

(Lei 7/1993, do 24 de maio)

Autorízase a Xunta de Galicia para que realice o desenvolvemento regulamentario da presente lei dentro do prazo dun ano, contado a partir da súa data de entrada en vigor.